

MADCOSËN DADA UAID

*Bëyuc choshon Uanën Esus chote chiaid
(Mat 3.1-12; Duc 3.1-18; Uan 1.19-28)*

¹ Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chiec onquiaid Nuquin Papan Isayas dada uamiampid nad iquec: “Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden: Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquico icsho mibi cuidenquio yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën.

⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash.

⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaaid tsiuquid niondash. Shioshbimboecquid shuishun pequid niondash. Bacun chequid niondash.

⁷ Aidëmbi naden chuibampondash: —Con tsyuecquid choendac. Aidi nadatiambocquin naquidquio nendac. Aidi bëdamboshëcquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmiosi? quec tsadebi.

⁸ Mibi acten mentoquid nebi; aidien abipadquiocquid aton Mayan menianquidquio nendac —quepondash Uan.

Esus acten mentoaid
(*Mat 3.13-17; Duc 3.21-22*)

⁹ Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash.

¹⁰ Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemboec Esusbëd icnuec budpondash.

¹¹ Aden budmetanec ambi bëcadoacnoëshi: — Mibentsëcquiobi icsho ëmbi tantiaidquio mibi nec, mado. Ëmbi bëdamboen isaidquio mibi nec — quepondash aton Papa Esus chiec.

Esus Nuquin Papan chiaid niacmenuequin Satanasën tanaid
(*Mat 4.1-11; Duc 4.1-13*)

¹² Aden chuibon budmeboed Mayanën: — Shubu nibëdacno nid — cac nidash Esus tsadpondash abentsëcquiobi.

¹³ Ambo tsadquimbi ushë abentsëc nidmec utsi choaid abutometsëcquieci tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid cho-pondash. Aden tanaqui niaquesambo yec tsad-pondash. Adec tsadnubi nidpondash Satanas. Ambobi bëdi nibëdquid deon caid chedo icpon-dash. Ambo tsadshobi ambi uaido mayan bëdabon cho-choshon nashumbededpondash.

Cadidia yacnoshon tauamboen chuibanaid
(*Mat 4.12-17; Duc 4.14-15*)

¹⁴ Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash.

¹⁵ — Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata — quepondash Esus comapenec onquec.

Ëböd iquec cho Esusën abia caido
(*Mat 4.18-22; Duc 5.8-11*)

16 Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash.

17 Aden nuëcquid bednuen nëshaid nënesho isec: –Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëböd iquec cho –quepondash Esus.

18 Adsho tantiash nëshaid abëd icquid menianec abi chuiquidbëd nidanepondash.

19 Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin.

20 Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid
(*Duc 4.33-37*)

21 Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash.

²² Aden chuisho tantiashun: —Ambia tanti-aquidën chiacpadomboen Esusën chuibanec. Ut-simbien adomboen chienquo iccosh —quec on-quec tabadcuededpondash.

²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash:

²⁴ —Esus Nasaded yacnoësh choquid miböd icquidpenquo nebique. Nidec nid. ¿Chian anédënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash.

²⁵ Adoaquien: —Otaquuo tabad —quetanquin: —Dapuduen —capondash Esusën.

²⁶ Adoac comapenec abi dapuduedaid uödëquenec sidquianec dapuduempndash.

²⁷ Adsho isash: —¿Abimbodambi ispo? ¿Mitsipadquidquo nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec.

²⁸ Adec onquecuededash auëshquo nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

*Simonën nachi bëdamiaid
(Mat 8.14-15; Duc 4.38-39)*

²⁹ Ambi chuisho tantiaboedo nidanenubien Pedito Simon caidën shubu yacno Esus Acobo Uan aitedi nidpondash. Aidën shubun icquidbidi aton utsi Andedes icpondash.

30 Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin.

31 Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bëdampondash. Adec bëdanash nid-toshon codocashun abi choquidtedi pemebampondash Simonën nachin.

*Esusën dadpen bëdamiaid
(Mat 8.16-17; Duc 4.40-41)*

32 Adnubien inchëshbudtsëqui Capednaun caid yacnocquidën daicsaidtedi bë-bëpondash. Adem-bidi mayan icsa dapuduedaidtedi bë-bëpondash.

33 Bë-bëash Simonën shubu shëcuë cuëmano puduedabi tabadcuededpondash.

34 Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

*Shubu nibëdacno Nuquin Papabëd onque Esus on-
quiaid*

(Duc 4.43-44)

35 Adashic badiadte anoentsëqui yanubi isucunanc puduanec shubu nibëdacno Esus nidpondash. Nidec tabadtuidshun Nuquin Papabëd on-quequin chuibampondash.

36 Esus nidacshobi isucunshun Petedo Simombëd icquidën nibënampondash.

³⁷ Aden nibënquin istuidashi: –Mibi isec cho-choquidtedishun mibi nibëmbededec – quepondash Esus caic.

³⁸ Adoaquien Esus: –Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid – quepondash.

³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuoapondash. Adembidi mayan icsa dapuduemeoapondash.

*Nami mishac tantiadenquiocquid bëdamiaid
(Mat 8.2-4; Duc 5.12-13)*

⁴⁰ Aden Esusën chuibanubien daushachimboecquid nami mishac tantiadenquiocquid chopondash. Esus yacno choash: –Dada icsambo iquebique. Mibi adquid tantiaquid icquin ëbi bëdame –quequin Esus chiec comapenec cuëdpondash.

⁴¹ Adec cuëdshobi nëid isash unësquio iquebi quequin ëquëducshun tantiaquin mishec Esus: –Mibi bëdamembique. Bëdambo icta

⁴² –quenubi daicsaid nibëdquio yec bëdampondash.

⁴³ Aden bëdametanquin nidmepondash: –Nidec nid.

⁴⁴ Nidquimbi, Esusën bëdamioshi quequin chuituidenda. Naden nata. Edusaden yacno nidash

Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbiecquid daēd meneta Moisesën chiacpadomboen ma anocquidēn napanueshun. Aden meniac abentsēc cuesuneshun utsi cuesunenu quenquiocquin cuesunaidēn intac puntanequin intac mibi daseccashun dēbimbiecquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash –quepondash Esus ambi bēdameboed chiec.

⁴⁵ Adsho tantiaboshombi niachidanquin Esusēn bēdamioshi quequin chuibenepondash. Aden chuibanac Esus yacno matses dadpen chochopondash. Adec cho-chosho isash shubu dadpen icquid yacno Esus tabadiapimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen chochopondash.

2

*Cuembo yec uishquiaid Esusēn bēdamiaid
(Mat 9.2-8; Duc 5.18-26)*

¹ Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen chochoapondash.

² Dadpen cho-choash puduedash tsucus-tsucustsēcquio yec tabadnubi adecbidi shēcūē cuēmano tabadpondash. Adec tabadsho isun

Esusën Nuquin Papa yacno shubu abentsëquën tabadte iquec quequin chuibampondash.

³ Adnubien cuembo yec uishquiaid bëec dada daëd-daëdquiec 4ted cho-chopondash.

⁴ Cho-choshon matses tsucus-tsucustsëcquio yec tabadsho isun dectatoshon macano nacnenaïd chic-chictanquin Esusën dayunquio uishquiaid imbudpondash.

⁵ Aton dayunquio imbudsho isun Esusën bëdamec quequin abi imbudboedën tantiec quequin ambibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

⁶ Adnubien isadaïdbo tsusedpabon nadomboen nata quequin chiaïd tantiamequidon ambobi tabadquin naden onquenquiocquin icsamboen tantiapondash.

⁷ ¿Atotsi quiash adec Esus onquepeque? Tantiyanu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bëpiscudquid nec, quetsëcquiec tabadpondash.

⁸ Aidon tantiaïd tantiec nadpondash Esus: — ¿Atotsieshun aden mimbi icsamboen tantiape?

⁹ ¿Mibi cuidenquio yec mibi icsaid bëpiscudobi quequin ëmbi chiaïdquio bëdantequidpenda nedic? Adecbidi, ¿Mibi icsambochoedi mibi bëdanoque. Nidtoшон mibi imbudboed chiadtoshon buanec nid quequin ëmbi chiaïd bëdantequidpembidida neoadic?

¹⁰ Ai, adquidquibidi nec. Mibi cuidenquio yec mibi icsaid bëpiscudobi queboed chidon tishac matses yanaid yequi chuiquidquio Esus nec que-

quin tantiesabo mibi nepec. Adquid icsho ëbi tantiamenuquin

¹¹ cuembo yec uishquiaid naden chiembique Tantia. Mibi icsambochoedi mibi bëdamiombique. Nidtoшон mibi imbudboed chiadtoshon buanec nid –capondash Esusën.

¹² Adoquien nidtoшон abi imbudboed chiadtoanquin buampondash. Aden buansho isash: –Nideque. Is. Adomboen nasho isamboccondambi –quetsëcquiec onquiash Nuquin Papan naid nec quec cuëdëncuededpondash.

Ëbëd iquec cho Esusën Debi caid
(*Mat 9.9-13; Duc 5.27-32*)

¹³ Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen chochoapondash. Cho-choasho isun Nuquin Papan chiaid chuibanoapondash Esusën.

¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash. Nidaid utsi yacno aton na ut-sibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bë-bësho isun piucquid bedshunoaquid Debi nepondash. Isadaidpembo ancaquidën, Con matsespembon piucquid bedshunta, cac bedshunoaquid Debi nepondash. Adshobien: –Ëbëd iquec cho –Esusën cac: –Ai, mibëd nidnu. Nid –quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusbëd icquidon pepondash. Ashunquiobidi aton na buansho isun piucquid bedshunquid

Debipadquidën utsin-utsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash.

¹⁶ Aden adquidbëdtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbëdtambi isadaidbon nadomboen nata quequin chiaid naisabëdtambi mibi chuiquidën pepec? Tantuanu. Èbi chui — quepondash padiseyobo Esusbëd icquido chiec.

¹⁷ Adsho tantiashien Esus: —¿Dada bëdamocquidta dauëchoquidën bëdametequid nedic? Padenquio. Daicsaidien dauëchoquidën bëdamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbëd icquid mibi iquendac quequin chiesa nebi. Icsaquid nebi queshun mibi icsaid ënta. Aden ënash, ëbëd icquid mibi iquendac quequin chuiquid nebi —quepondash Esus.

¿Atotsi quiash mibëd icquid buna mëmunesa nec? quiaid

(Mat 9.14-17; Duc 5.33-39)

¹⁸ Adnubien abi chuiquid quënën nauedan aid tantiec unësquiocquin Uan acten mentoanquidbëd icquidën buna mëmunubi padiseyobobëd icquidon unësaid tantiec unësquiocquin buna mëmunoapondash. Aden buna mëmunsho isanec nidequi Esus yacno nidash Esusbëd icquidon buna mëmunenquio icsho isash utsibo: —¿Atotsieshun Uambëd icquidon adembidi

padiseyoboböd icquidon buna mëmunubi miböd icquidon buna mëmunenquio icpec? Tantianu. Chui—quepondash.

¹⁹⁻²⁰ Adoaquien Esus: —Aton chido bednun pambid meniac chidon codocacsho abi inquidën aböd icquido menec. Aden meniac isuidesa aböd icquido nec. Adecbidi ëbi abi chuiquid icnuc ëböd icquidon buna mëmunenquiocquin isuidenquio iquec. Yuecash chido inquid nibëdanan aböd icboedo unësquiocquin buna mëmunquin isuidpec. Adecbidi ëbi nibëdanan ëböd icboedo unësquio yampec.

²¹ “Adembidi dashcute shë nibëdta chucambocquid bëtuscasa matses nec. Shë nibëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec.

²² Adembidi dadpen icquid chodo uashun sandoc. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiacpadec pausudnu qeshun mibi icsaid ënacsho isun Nuquin Papan pausunendac — quepondash Esus.

*Chonoadtemaid ushë icbo nebi quiaid
(Mat 12.1-8; Duc 6.1-5)*

²³ Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusböd icquidon pepondash.

²⁴ Adshobien: —Miböd icquido is. Chonoadtemaid ushën chonoadeque. Abi chuiquid mibi

iquec ¿atotsi quiash, Padi. Chën, quenquio ique?
—quepondash padiseyobo Esus caic.

²⁵ Adoaquien Esus: —¿Chuiquid Dabidbëd icquidon natia bunquin ambi petemaïd pepondash quequin dada uapampid tantiamboda icconda?

²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaïd quënën puduedshun Nuquin Papa tantianuequin pan meniac sanaid bedshun ambi petemaïd abëd icquidobëdtambi abi chuiquidën Dabidën pepampic. Puduedtemaïd quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuioapondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Choadtemaïd ushë nec, quepadenebi con pabëdi. Aden chiequi matses tiboedte ushë aton icho ictiapimbo iquec.

²⁸ Aid ushë icho icquin ëbëd icquidon bunquin pebededsho isash, Padi. Choadtemaïd ushë neque. Aden penda, quenquiocobi —quepondash Esus abi chieshënquido padiseyobo chiec.

3

*Mëuesadaid Esusën bédamiaid
(Mat 12.9-14; Duc 6.6-11)*

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi

² Esus chieshënquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bédamepeque. Nëid badiadën bédamesho isun bedmeshun quënën nauedmenu quetsëcquiec padiseyobo tabadcuededpondash.

³ Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴ Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bédamepe? ¿Bëdamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵ Adoquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bëdampondash.

⁶ Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec

bunebi. ¿Mitsipadentsimbi cuesunemenuen bed-mepeba? —quecuededpondash padiseyobo.

Esus yacno matses dadpen choaid

⁷ Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash.

⁸ Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uguë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiash cho-chopondash.

⁹ Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abëd icquidquio caic.

¹⁰ Dadpen bëdamiosh cadoshe. Èbitsen bëdanu quequin ambibi tantiaquin Esus mishbededpondash.

¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash.

¹² Adoaquien: —Padi. Aden ëbi chienda —quepondash Esus.

*Abëd 12ted icquid Esusën tantiamenu caid
(Mat 10.1-4; Duc 6.12-16)*

¹³ Adashic macuësh dapa yacno nidnushi abëd 12ted icquido chomeshun nadopondash:

¹⁴ Ęmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi.

¹⁵ Adembidi mayan icsa dapuduedaid dapudue-mequidbidi mibi icmembi quequin abëd icquido Esusën chuipondash.

¹⁶ Ambi tantiamenu caid nëidtedi icpondash: Simon cashumbic Esusën Petedo capondash,

¹⁷ utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash.

¹⁸ Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash.

¹⁹ Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidtedi Esusën tantiamequin chuiquin ismiaido niondash.

*Bedtsibu caidën dausunaid Esus nec quiaid
(Mat 12.22-32; Duc 11.14-23; 12.10)*

²⁰ Aidtedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquio icpondash.

21 Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

22 Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: –Mayan icsan icbo Satanash cashumbic Bedsibu caidën tantiamiaid Esus nec. Adquid icquin mayan icsa matses dapuduedaid dapuduemec –quepondash.

23 Adoaquien Esus: –Mimbi icsamboen tantieque. Mibi chuibanu. Tantieq tabadta. ¿Mayan icsan icbo ambi dapuduedmiaid dapuduemequidta nepadic? Padenquio.

24 Adquiecbidi shubu icbo abëd icquido cuëshëdmesa nec.

25 Icbon abëd icquido cuëshëdmiaish shubu abentsëquën tabadtiapimbo iquendac.

26 Adembidi ambi dapuduedmiaid dapuduemiash adquidën icbo ictiapimbo Satanash iquec. Icbon icnuequid abëd icquid puduemesa nec.

27 Dadpeshun icbo Satanash nec. Adquid icquin ambi matses dapuduedmiaid dëniacanquidënuidquio nadatiambocquin nabanquin cuemepec. Adquid icquin ëmbi nac mayan icsa dapuduedaid Satanashën yua icboedi icbombo tantieq bëdambo yanec ëbëd iquendac.

²⁸ Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiashun Nuquin Papan aid pauquendac.

²⁹ Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquo iquendac. Adquid ënëdenquo yec icsaquid nendac —quepondash Esus

³⁰ Satanasën tantiamiac mayan icsa dapudemequid Esus nec abi caquido chiec.

*Esus yacno aton utsibo anibëd choaid
(Mat 12.46-50; Duc 8.19-21)*

³¹ Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chiec.

³² Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash.

³³ Adoaquien Esus: —Adquid utsi chuinu. Tantiata.

³⁴ Në tabadquido ëbëd icquido neque. Is —quepondash Esus abëd iccuededquido chiec.

³⁵ Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

4

*Tantiamequin pete ëshë nësecain chiaid
(Mat 13.1-9, 18-23; Duc 8.4-15)*

¹ Adashic padpidec chian cuëmano nidshun Esusën tantimequin chuibanopondash. Aden chuibanuc cho-choquid dadpen icsho isash cano antabêdtopondash cho-choquid acte cuëmano tabadnubi.

² Adec tabadshobi, matses nadquio iquec quequin tantiaquin tiedën caniquid ëshë Esusën tantimequin naden chuibampondash:

³ —Tied icbo pete ëshë nësecanuec aton tied yacno nidquid.

⁴ Adec nësecanuec nidshun pete ëshë nësecac maisec pudun-pudunaid uicchunën chequid.

⁵ Adnubien nidaid cuënote dadpen samëdacno utsi-utsiec paëdash badedquio dëyucuidtsash

⁶ tapunenquio iquec ushën shoedec.

⁷ Adnubien pete ëshë utsi-utsiec nisanquid dëyucacno paëdash dëyucash canidouidtsacsho nisanquidën bëtinac podo sinash bacuëtiapimbo iquec.

⁸ Adnubien nidaid bëdambo yacno paëdaid dëyucaid caniaash dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

⁹ Aden chiash: —Ëmbi chuiboed tantianu quiash bëdamboen tantiec papuduedta —quepondash Esus.

¹⁰ Aden chuibanash udictsëc Esusbëdi nidshun utsibo choenquiocsho isun databêdtuidquin abëd icquidon: —Mimbi chuibamboed tantianu. Ëbi chui —capondash Esus chuiquin.

¹¹ Adoaquien: —Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc.

¹² Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac.
Aden abi icsaid ënsho isun cuidenquio yec
Nuquin Papa abi icsaid bëpiscudtsiandac”

—quepondash Esus abëd icquido caic.

¹³ Aden chiashic: —¿Mimbítsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibansho mímibi tanti-ape? Ëmbi chuiboed nad iqueque. Tántia. Chuinu.

¹⁴ Pete ëshë sequidbimboecquid Nuquin Papan chiaid chuibanquidquio nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec.

¹⁵ Nidaidën paëdash pete ëshë dëyuctiapimboesho uicchunën chiaidbimboec matses utsi-utsiec iquec. Adquid Nuquin Papan chiaid tantiash papuduednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec.

¹⁶⁻¹⁷ Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushën shoedaibimboec matses utsi-utsiec iquec. Adquid Nuquin Papan chiaid tanti-aidash bëdambo iquec queboedi ¿Esus tantiaquid nebi quecta icco? quequin utsibon mamënsunac badedquio tantiesa nebi quendac.

¹⁸⁻¹⁹ Nisanquid dëyucacno pete ëshë paëdash dëyucash canidoidtsacsho nisanquidën bëtinac

podo sinash bacuësabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aitedi tantiaquin Nuquin Papan chiaid tantiesa yanshun bēdamboec tabadaid ismesa yanec. Adquidēn Nuquin Papan chiaid tantiaquid utsi icmetiapimbo iquec.

²⁰ Ēshē utsibic nidaid bēdamboequidēn paēdash dēyucash caniash dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bēdamboec tabadquin utsi ismequid nec. Aden ismiac Nuquin Papan chiaid tantiaquid daēdpactsēc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshē yanendac —quepondash Esus abēd icquido tantiamenuc.

Tabote nënantan nanac chēnquiacbimboec ictiad quiaid

(Duc 8.16-18)

²¹ Aden chuishumbic abēd icquido naden Esusēn chuipondash: —¿Tabote icbon ambi dayun uaboed taboshon tsadte tēdion nanshun isaidta nedic? Adembidi ¿Tabote matsun bētashun isaidta neoadic? Padenquio. Nënantan tabote nanac chēnquiacbimboec ismenu quec ictiad.

²² Adquiobidi abi yacno yuedanquid ambi dayun uapampidi nēbi Nuquin Papan dayun uainquiocquin ēbi chomeshun ismec. Adembidi con mado chuiban quenquiochoedēmbi nēbi ēbi ismec ma con mado chuibanu quequid con Pa nec.

23 Ambi chiaid tantianu queshun tantiaquiec papuduedta —quepondash Esus.

24 Aden chiash Esus: —Chiaid bëda tantiatequidquio iquiec queshun tantiaquiec papuduedquid icta. Aden chiaiduidi tantiec papuduedquid abipadquid bëdambocquid ambia tantiaquidën Nuquin Papan mibi icmendac.

25 Adquid ambi tantiadoniaidquio iquendac. Aden tantienquioctsäcquidën tantiaid bëda ue-sadendac nibëdquiec —quepondash.

Ambi siaboed icbon isenquiocnoc bacuëec quiaid

26 Adec onquequin abëd icquidquio chuishumbic cho-choquidtsen naden Esusën chuipondash: —Nuquin Papan shubu abentsëquën tabadec caidaidquio chuibanu. Tantiata. Nidaid bëdan tiedën caniquid pete ëshë siash

27 tabadquin cainquidquio icbo nec. Dadpen ushquin ambi seboed isenquio yec icbo tabadnubi

28 ambi seboed dëyucash caniec taitanec bacuëec.

29 Ambi siaid isenquiocnoc canitanec bacuëacsho badedquio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papuduedquioshon tantiabenec. Adquid isash con shubun puduedquido neque. Bednu quependac Nuquin Papa —quepondash Esus.

*Mostasa caid ëshë chiaid
(Mat 13.31-35; Duc 13.18-19)*

30-32 Adec onquequin chuibanashic Esus: — Nadquio Nuquin Papan shubun icquido iqueque. Chuinu. Tantia. Mostasa caid pistsëc êshëmpi ictsëcquid nêsecaid dëyucash nuamboshë caniec cuidi-cuidipambo iquec shubu-shubupambo yec podoc. Ambo uicchunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

33 Aden chuibanshumbic adomboembidi Esusën chuibampondash. Aden chuibanash, aïdtedquio tantiapec abibi queshumbic aden chiaid chuiquin ëmpondash Esusën.

34 Aden abited chuibanshumbic abëd icquiduidtsëqui bëdamboen tantiamequin chuipondash.

*Acte tÛccoasquiaid ënëd cac ënëdaïd
(Mat 8.23-27; Duc 8.22-25)*

35 Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquuidtsëqui nidnu. Nid —quiampondash abëd icquido caic.

36 Aden chiac chian cuëman tabadcuededquido niananec badedquio nidquin canon Esus buampondash. Abëd icquidon potenubien cano antabëdtoanquin utsin-utsinquien potepondash.

37 Aden potenubien cunquequid dapan acte tÛccoasquequin cano acte uemiaidën mentoadtsempondash Esus tÛotadec ushnubi.

38 Adec uec usho: —Cunquequid dapan acte tÛccoascaidën nuqui mentoeque. Isucunta, icbo —quequin Esus timpondash.

39 Aden tinac uëtsëdtoshon Esusën: — Mibi comapenec cunqueque. Ënëd —cac

badedquio ënëdpondash. Adembidi: –Mibi comapenec tëccoasqueque. Ënëd –cac badedquio ënëdoapondash acte.

⁴⁰ Aden ënëdmetanec Esus: –¿Atotsi quiaash ëbi tantienquio yec dacuëdcuedede? Ëbi tantiesa mibi nepec –quepondash abëd icquido caic.

⁴¹ Adec Esus cuënubi badedquio cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cac-padequi ënëdposh –quec abibi onquecuededequi uëdëquianquiopondash abëd icquido.

5

Mayan icsa dadpen dapuduedaid bëdamiaid (Mat 8.28-34; Duc 8.26-39)

¹ Adshumbic acte tëccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash.

² Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash.

³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid ichoedi nadati-ambo yanshobi mëtanetiapimbo yampac caondash.

⁴ Abi mëtaniaid shocosh bucu seccduatanquin tës-tëstenepac caondash. Adosho isac abi taneboc-padquid utsi nibëdpac caondash.

⁵ Aidi inchëshën capucuenequi mëyanacimboec sidquecuenepac caondash. Adec capuequi

cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquianec choash: —¿Tsusio, ada cho? —quiashic:

⁷ —¿Mibëd icquidtabi nedi? Mimbi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec.

⁸ Adec mayan icsa dapuduedaid abi onqueshobien Esusën: —Dapuduen —cashic:

⁹ —¿Tsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

¹⁰ Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

¹¹ Adnubien macuësh potseshun chancho dadpenshun pec tabadpondash.

¹² Aden pec tabadsho isashien: —¿Ada mimbi ëbitedi chancho dapuduedmetsia? —quepondash mayan icsa Esus caic.

¹³ Adoaquien: —Dada dapuduencuededash chancho dapuduedcuededta —Esusën cac dapuduencuededash acte dapa quiusudacnombo comapenec niqec pudun-pudunec mentoadbudnepondash chancho nibëdquiec.

¹⁴ Adsho isash chancho pemequin isquido chiec nidanepondash. Adec nidquimbi shubu dadpen

icquid uano-uanoec tabadquido chuituidac aidot-sen isec cho-chopondash.

¹⁵ Esus yacno cho-choshon mayan icsa dapuduedaid bēdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquiocboedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsēcquiec tabadcuededpondash.

¹⁶ Adec tabadsho isun mayan icsa dapuduedaid bēdamequin chancho dapuduedmesho isboedon cho-choquido tantiamenuen chuibampondash.

¹⁷ Aden chuisho tantiashun cho-choboedon: — Nēmbo tabadenquio yec nidec nid. Mibéd tabadtiapimbo iquebique —capondash comapenen Esus chushcaquin.

¹⁸ Adsho tantiash cano yacno nidequi cano Esus antabēdtonobien mayan icsa dadpen dapuduemoed choash: —Mibéd icte bunebi. ¿Adabi buane? —quepondash.

¹⁹ Adoaquien: —Padi. Min shubuno nidtan. Ambo nidshun mibi bēdamequin mayan icsa dadpen dapuduemoed Nuquin Papa tantiaquin chuiban. Nuquin Papan ēbi ad icsho unēsquiocquin dapuduemiac quequin chuiban —quepondash Esus.

²⁰ Aden Esusën chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Es-

usën bēdamiash, quec abibi onquec tabadcueded-pondash.

Nua intac budaid bēdameshun champi unēsaid bēdamiaid

(Mat 9.18-26; Duc 8.40-56)

²¹ Adshumbic canon Esusbēd icquidon padpiden abi chobocmibidi chian poteoapondash. Adec chosho isash matses dadpen chian cuēmano padpidec cho-choashun mananuc Esus pudundotsēcshobi badedquoio tsucus-tsucustsēcquoio yec datsidadpondash.

²² Adnubien Nuquin Papan chiaid chuibante shubun tabadquido isquid, Aido cuēmēdquid, cho-pondash. Adec choquimbi Esus istuidash mibi bēdambocquid nec quequin ismenuec Esus tauebudshun:

²³ —Con champi unēseque. Aid mishquin bēdamec cho —cac

²⁴ Aidobēdi Esus nidpondash.

Adec nidshobi matses dadpenshun tsibanampondash. Tsucus-tsucustsēcquoio yec nidquin Esus tsibanampondash.

²⁵ Esus tsibanquidquoio chido utsi icpondash. Aid chido seta 12ted matamec intac budash bēdanenquiocquid icpac caondash.

²⁶ Dauē meniaqui bēdanenquoio icpac caondash. Dauēchoquid utsi-utsien piucquid menequin dauē bedshun chequi bēdanenquoio yec intac nuambo yampac caondash aton piucquid naimēdnubi.

²⁷ Adec intac icnubi capuquin Esusēn nabanaid chuisho tantianec nidquimbi matses dadpenshun tsibananubi aidēntsen tsibanampondash. Aden matses dadpenshun tsibananubi ismenquiocquin

cachoc choshon Esusën dashcute mishpac caondash.

²⁸ Aden aton dashcuteuidtsëqui mishec bēdampatsiash icmane queshun mishtsequi bēdampac caondash.

²⁹ Intac bēdanenquiocquid Esus mishec bēdampac caondash. Ēmbi tantiacpadquiequi bēdanobi quequin ambibi tantiapondash.

³⁰ Adec chido bēdanubien ěmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

³¹ Aden chuisho tantiaashun abēd icquidēnquio: —Tsucus-tsucustsēcquio matses dadpen iquec, ¿tsuntsimbini mishosh, quecta ique? —capondash.

³² Adec abēd icquid cuēdnubi onquenquiocquin, ¿Midaquidēnquio mishoshibique? Isnu, abibi quequin matses utsi-utsien bēispondash Esusën.

³³ Aden bēisbanubi, ěmbi mishoc quenquio yec bēdamboed uēdēquec choequi mibi nadatiambocquin naquid nec quequin tantiequi Esusën taēno uebudshun abi mishec bēdanaid chuibampondash.

³⁴ Adoaquien Esusën: —Champi, mimbi tantiacpadquiequi mibi bēdanoc. Dada icsambo icboedi nēbi dada bēdambo mibi iqueque. Bēdambo yec nid —capondash chido chuiquin.

³⁵ Aden nidmenubien Aidon shubun icquid choshon: —Min champi unēsoshe. Tsusio chomena —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ěbi tantiata —quepondash Esus.

37 Aden Aido chuishun Esusën: –Cho-choenda –capondash abi tsibanuequido chuiquin. Aden chianec Petedobëdta Acobo Uan, Acobon utsimbo aidtedi buanec Esus nidpondash.

38 Adec nidequi Aidon shubuno choquin comapenec shubicuededsho tantiatuidpondash.

39 Aden tantiequi puduedash Esus: –¿Atotsi quec comapenec shubicuedede? Champi unësenquo yec ushacimboec uec nec – quepondash.

40 Adshobien tantiesa icquin mamënshumbededpondash. Adoaquien aidtedi puduemiasch champin tita aton papa chedo abëd icquidbëd champi yacno Esus puduedpondash.

41 Ambo choshon mëdante mëdintanquin Esusën: –Talita, cumi –capondash. Aton onqueten, Champi, isucunash nidto, quequin adopondash.

42 Adoac badedquo isucunash nidtoash capupondash. Champi seta 12ted icquid niondash. Aidi bëdansho isun abitedishun, Adopenshenda iquec quequin isbededpondash.

43 Aden champi bëdameshun Esusën: – Ëmbi naboed utsi chienda. Abimbo caimbi. Abentsëcquiobi chienda –capondash. Aden chuitanequi: –Champi peme –quepondash Esus.

6

Abi icnëdacnoshon Esus chieshënquido (Mat 13.53-58)

1 Auëshquo puduanec nidequi abi icnëdacno Nasaded caid yacno Esus choapondash. Abëdi abëd icquido chopondash.

² Ambo tabadashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsëc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidën ismiac Esusën nadatiambocquin nabampec? —queoapondash.

³ Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquiec tabadec onquecuededec chieshcuededpondash.

⁴ Aden chieshënaqui Esus nadpondash: —Utsi yacno nidshun Nuquin Papan chiaid chuiban-sho tantiaquid dadpen icnubi abi yacno chuiban-sho chieshënquid aton matses iquendac. Aton shubun icquido adecbidi iquendac —quepondash Nasaded yacnocquido chiec.

⁵ Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquio daëdpactsëc icsho mishquin bédamepondash.

⁶ ¿Atotsi quiash ëmbi chiaid tantiatipimbo icpec? Adembidi nadatiambocquin nasho istiapimbo icpec quepondash Esus abibi onquec.

*Abëd icquido Esusën nidmiaid
(Mat 10.5-42; Duc 9.1-6)*

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash.

⁷ Adec cuenadquin chuibanecui abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshundaëdshunquien chuibanec nid. Chuibanquimbi mayan icsa dapuduedaid dapudemeta.

⁸ Nidquin dadpen mitsana sauedshun buanenda.

⁹ Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta.

¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta.

¹¹ Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomben ismeta —capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomben nabanta quequin chuibampondash Esusën nidmiaidon.

¹³ Adembidi mayan icsa dapuduedaid dadpen dapudemepondash aidëmbidi. Adembidi nënquid

dadpen daicsaid chedo cuëte bacuë bëchichoquid
ënë dachinquin bédameoapondash Esusën nidmi-
aidon.

Uan acten mentoanquid mapi butiaid
(*Mat 14.1-12; Duc 9.7-9*)

14 Adnubien, Chuibanquimbi Esusën
nadatiambocquin nabanosh, quequin isboedon
ancanquid Edodes chuipondash. Aden chuiban-
chuibanac dadpenshun Esusën nabanaid
tantiapondash. Aden tantiash: –Uan acten
mentonondaid mapi butemeboed uincuempash
icnui. Adec uincuenshun nadatiambocquin
nabanec nepanui –quecuededpondash
tantiaquido.

15 Adnubien utsibo: –Ediasien nechitec.
Nuquin Papan chiampicpadquiec choashien nec
–quecuededpondash.

Adnubien utsibo: –Nuquin Papan
chiaid chuipampidien Esus yanchitash –
quecuededpondash.

16 Adnubien Edodes: –Ëmbi mapi
butemiondaid, Uan pado, uincuempash icnui
–quepac caondash.

17 Ënden aidëmbi Uan bedmeshun tanemeshun
quënën nauedmepac caondash. Aidëmbi aton
utsin chido, Edodias caid, bedacsho isash:

18 –Min utsin chido mimbi bedaid natemaid
niosh –queshun Nuquin Papan Moises dada
uamepampicpaden Uanën Edodes chuipac
caondash. Adoac, Uanën chuisho dadpenshun
tantianushe quesahun Uan bedmeshun quënën
nauedmepac caondash Edodesën.

19 Adoaquien Uan Edodiasën chieshënquin: — Uan cuesunemetiadquidi mibi nec — quepac caondash aton bënë Edodes caic.

20 Uan bédambocquid Nuquin Papan chomiaid-bidi nec queshun Edodesën Uan cuesunemeti-apimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëid napeba? Ambi chuibanaid bédambo iquec. Aidën chuisho tantiash bédambo iquebi, abibi queshumbic Edodesën chomedednepac caondash chuisho tantianuen.

21 Adnubien aton chido bunacpadomboen Uan cuesunemete ushë chonobi naden napac caondash: Aton bënëni abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash.

22 Aden aitedi cho-chomiash tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Èbi chui.

23 Abimbo caimbi. Mibi bunaid èbi chuita. Mitsanatedi bunebi èbi casho tantiashun dadpen mibi menembi —quepondash.

24 Aden Edodesën chuisho tantiash: —¿Atotsibi bumpeba? —quetanec aton tita yacno pudued-

shun: —“Mibi bunaid mibi menenu. Ēbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵ Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶ Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun:

²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin

²⁸ maspanën nandoshon bëshun champi meniac bedshun champin aton tita menetuidpac caondash.

²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid

(Mat 14.13-21; Duc 9.10-17; Uan 6.1-14)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash.

³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd

icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiashic cano antabëdtoanec matses nibëdacno nidpondash aightedtsëqui.

³³ Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash.

³⁴ Adec aitedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantiamequin Nuquin Papan chiaid chuiquid nibëdacbimboecnuc matses cho-choec quequin tantiec unësquoiquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme.

³⁶ Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷ Adoquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

³⁸ Adoquien: —¿Panëmpi penun bëaid iccuedquidon na tedtsi iqueque? Ista —capondash Esusën.

Aden chiac ashunquiobi matsesën bëaid is-banash abëd icquido: —Panëmpi sincoted icnubi nuëcquid dosted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccued-edquido chuiquin.

⁴⁰ Adoac ambi chiated-tedquiec tabadbudpon-dash.

⁴¹ Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatambocquin naid ismembi —qeshun cuësh-cuëshun: —Meneban —Esusën cac abëd icquidon menebampondash.

⁴² Menebanac piash: —Padi. Piombi —quecuededpondash pequido.

⁴³ Aden piambien abëd icquidon napi uaid bed-bampondash. Napi uaid sandobanaid tsitsan 12ted icpondash.

⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadate-dictsëqui tambampondash 5000ted iquec que-quin.

Acte bëntse Esus choaid
(*Mat 14.22-27, 34-36; Uan 6.16-21*)

⁴⁵ Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembi —quepondash Esus abëd icquido caic.

⁴⁶ Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash.

⁴⁷ Adnubien inchëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash.

⁴⁸ Ashunquio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadtiapimnococ acte bëntse choquin abëd icquido Esusën ismetuidpondash.

⁴⁹ Datantsensho isash, Mayambien nechitec, quequin ambibi tantiec sidquecuededec

⁵⁰ dacuëdcuededpondash.

Adsho isumbien: —Ëbibi nebique. Dacuëdenquio yec tabadta —capondash Esusën.

⁵¹ Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido.

⁵² Panëmpi daëdpactsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquio icoapondash pamunacimbocquin.

⁵³ Ashunquio chian potiashic nidaid Quenesaded caid yacno choshon cano nëshpondash.

⁵⁴ Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi

⁵⁵ daicsaid aton ueten nandoshon Esus yacno bë-bëpondash.

⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, qeshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bëdancuededpondash.

7

Nuquin Papan paucaid (Mat 15.1-20)

¹ Adashien Edusaden caid yacnoësh padisey-obobëdi isadaidbo tsusedpabon chiaid tantiaquin chuiquido Esus yacno choshon,

² Ëmbi mishboed mishtemaid ictsiash, quesa iquec tsusedpabon chuinëdacpadquiec mëpanudabi Esusbëd icquidon pesho ispondash.

³ Padiseyobo isadaidbobidi yec tsusedpabon chuinëdacpadquiec penush mëpanudanequid nec.

⁴ Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambì chuinëdacpadomboen dëshotetsen cachonouidi dapanquidquiobidi nec. Adembidi matsu nacnenaïd cachonouidi dapanoaquidquiobidi nec. Shocosh matsu cachonouidi dapanoaquidquiobidi neoaic. Tsusedpabon chuinëdacpadomboen naquidquio nec.

⁵ Aden nabanquidquio padiseyobo nec. Adquio-bidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquiocquin mëpanudabi pepeç —quepondash Esus caic.

⁶ Adoaquien Esus: —Isayasën ëndenquio dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bëdambocquid nec quequin chiacpadomboen tantiesa isadaidbo nec.

⁷ Abia Yampidënquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquio nec.”

⁸ Aden tsusedpabon chuinëdacpadomboen nabanquin Abia Yampidënquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuec.

⁹ Aden chuishumbic adomboembidi chuioaic: —Badedquio Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape?

¹⁰ Nuquin Papan chiacpadomboen Moisesën dada uampid nad iquec: “Titan papabëdtan chiaid chieshenquiocquin naban.” Adquidën chiaid

utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec.

¹¹ Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec.

¹² Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic.

¹³ Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec –quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chiashic: –Utsibo, tantiec cho. Mibi bëdamboen chuinu. Bëdamboec papuduedta.

¹⁵ Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic.

¹⁶ Ëmbi chiaid tantiaquin utsi chuibanta —

quepondash Esus.

¹⁷ Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantieme — quepondash abëd icquido.

¹⁸ Adoaquien: —Utsitedishun tantienquo ichocpadquido mibitedi neque. Tantia. Mimbi piaidën mimbi tantiaid icsabudtiapimbo iquec.

¹⁹ ¿Min tantiate yacnoda mimbi piaid nidpec? Padenquo. Mimbi piaid min pucu yacno budbudec auëshquo chimu nëncuenash puduenec — quepondash abëd icquido caic.

²⁰ Aden chiec onquiashic: —Mimbi tantiacpadquiequi mibi icsabudec.

²¹ Chido mimbi inacmaid isash chudtiadquo iquec quequin mimbi tantiacpadomboen chido isuidtiapimbocquin mimbi chudtedchudtedec. Utsin na bedtiadquo iquebi quequin mimbi tantiacpadomboen mimbi ampec. Cuesunetiadquo iquebi quequin mimbi tantiacpadomboen mimbi cuesunepec. Utsin chido chudtiadquo iquec quequin mimbi tantiacpadomboen aidi mimbi chudpec. Dada utsin ëbi bëdaidquiocsho ispec quequin mimbi tantiacpadomboen min bënëpenquo chudmequid mibi nec.

²² Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquo mibi yampec. Mibibi icsambocquid nec quiash chieshëmënquid mibi nendac. Adquid abimbo chiacbimboen chuiquid

mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bēdambo icsho isash chieshēnquid mibi icpec. Utsi icsamboen chuiquid mibi nendac. Utsin chuisho, Ēbentsēqui tantiaquidquio nebi, quequin mamēnshunquid mibi nendac. Adembidi nasho mamēnshunoaquidbidi mibi nendac. Ēmbia tantiaquid nebi, quequin mimbibi nabanaid icsa isash bēdambo iquec quec mibi mamēnec tsadec.

²³ Ēmbi chuiboedtedi icsaquidēn naid nec. Aden tantiaquid icsabudte nec –quepondash Esus.

*Sidopenisia caid yacnoësh chido ambi tantiac-
padquiec bēdanaid
(Mat 15.21-28)*

²⁴ Aden chiashic isadaidbo yacnoësh pudu-
anec nidequi isadaidpembo yacno nidpondash.
Shubu dadpen icquid Tido caid anoentsēqui yacno
choash shubun puduedash: –Nēmbo ēbi choaid
chienda –quepondash Esus. Ambi chiacpadpen-
quiocnoc chuisho tantiapondash anocquidon.

²⁵ Adoac: –Esus chosh –quesho tantiashien
mayan icsa dapuedaidēn tita Esus tabadacno
nidpondash. Adec nidec puduedequi Esus taue-
budpondash chuiquid dapa nec quequin tantiec.

²⁶ Isadaidpembon chido nidaid Sidopenisia
caid yacnocquid niondash. Aidi Esus tauebudash:
–Con champi mayan icsa dapuedaid
dapudueme, tsusio, –quepondash comapenen
chiec.

²⁷ Adoaquien Esus: –Mabi con matses
isadaidboba bēdamenuc choboc. ¿Bacuēbo
cubudabicnubi opashēmpida pete menequin anin

bënepadic? Padenquoio. Adembidi, ¿isadaidbotedi bédamiabidambi matses utsibo, isadaidpembo, bédamepadi? —quepondash Esus.

²⁸ Adsho tantiashien chido: —Icho, mimbi bédamboen chiec. Padnuen anin meniac bacuëbon pete sananaid cuëshëmpi paëdtsacsho opashëmpin ambibi bedshun pec. Adembidi mimbi nadati-ambocquin nabanac isadaidbo dadpen bédanubi isadaidpembo abentsëc tantiaquid yec bédanoapec —quepondash chido.

²⁹ Aden chidon chuishobien: —Bédamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusën isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocono ënden mayan icsa niquian bédanash abi ushaidëmbi uec.

Pashu buëd onquenquiocquid Esusën bédamiaid

³¹ Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash.

³² Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bédame —capondash.

³³ Adsho tantiashun iccuededquido ismen-quiocnuen udictsëc dada icsa buanshun aton mëdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uicchun mëpidadtanquin pashun ana mishpondash.

³⁴ Aden amishec abuc isec: —Epata — quepondash. Paucud, quec adpondash Esus.

³⁵ Adec Esus cuëdnubi pashu buëd onquen- quiochoedi tantiadcuenash onquiampondash.

³⁶ Aden pashuaid bëdamiash: —Esusën naid nec quequin chienda —quepondash Esus. Adoboqui niacbidanquin chuibampondash.

³⁷ Aden chuisho tantiash: —Adquidshenda Esus nepec. Ambi naidtedi bëdambo iquec. Pashu pauc- quid nec. Adembidi ana onquesa oncamequid nec —quec onquecuededpondash.

8

4000ted matses Esusën pemiaid

(Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpon- dash:

² —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac.

³ Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiec.

⁴ Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpat- sia? —quepondash abëd icquido.

⁵ Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

⁶ Adnubien: –Tabadbud –quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: –Nëid meneban –cac abëd icquidon iccuededquido menebampondash.

⁷ Adembidi nuëcquid dëmishaid daëdpactsëcbidi bedshun: –Mimbi meniaid nec quequin tantiemi, Papa –queshun: –Nëidtsen meneban –Esusën cac menebanoapondash.

⁸ Aden menebanac piash: –Padi. Piombi –quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash.

⁹ Peboedo dada caniaid dadpen 4000ted icpondash. Chidon aton bacuëbobëdtambi pepondash.

¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

¹¹ Aden potiash tabadnubien cho-choshon padiseyobon: –¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu –capondash Esus chuiquin.

¹² Adsho tantiash, Èbi tantiesa nec, quec unësquo yec tsadequi –Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquo iquemi. Abimbo caimbi –quepondash Esus.

13 Aden chianec nidec cano antabëdtoanquin uquë cuëma utsiuc poteoapondash.

*Nuquin Papan chiaidbëdta ambi chiaid daëd
uaquin chuiquid padiseyobo
(Mat 16.5-12)*

14 Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc.

15 Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquec. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane qeshun ambi tantiacpadomboen nabanenda —capondash Esusën abëd icquido chuiquin.

16 Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

17 Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadac bimboecta tsadpo?

18 Adecbidi ¿Ëmbi chuibanaid tantienquio yec pashuac bimboecta tsadoapo?

19 ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

20 Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caopondash Esusën.

Adoaquien: —Siete iccosh —quepondash abëd icquido.

21 Adoaquien Esus: —¿Nadatiambocquid Esus nec quequin ëbi tantienquioda mimbi icpe? —quepondash abëd icquido caic.

Betsaida caid yacnoshon bëshu bëdamiaid

22 Adshumbic Betsaida caid yacno poteapondash Esusbëdtambidi. Aden potias chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamanquidquo icquin mishquin bëdame —capondash Esus chuiquin.

23 Adsho Esusën bëshu mëdianquin Betsaida caid anoentsëqui buanshun uicchun bëcuishtuatanquin bëmishec: —¿Ada mimbi isequè? Èbi chui —capondash Esusën.

24 Adsho tantias Esus isquin: —Bëdamboen isenquiocquin cuète podo inchëshquo yacbimboecnuc mibi isembi —capondash bëshuaidën.

25 Aden chuishobi Esusën bëshuaid padpiden bëmishoaquien bëcudquiopondash bëdamboen isec.

26 Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

*Quidistu mibimbo neyoc, Petedo quiaid
(Mat 16.13-20; Duc 9.18-21)*

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: — ¿Atotsi Matsesën ëbi capec? —quepondash Esus abëd icquido chiec.

²⁸ Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

²⁹ Adsho tantiashun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid ut-sibo onquiacbimboen chuioaic.

³⁰ Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid
(Mat 16.21-28; Duc 9.22-27)*

³¹ Aden chuishun abi unës uate tantamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqui daëdec ushash uincuenoaindabi, quequin Esusën chuipondash.

³² Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiash auchbidi bididquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec chochoquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquïn ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda.

³⁵ Esus tantiaquin ambi chiacpadomboen nanu queboedi unësmene quequin naisa Nuquin Papa yacno puduedtiapimbo iquendac. Èsus tantiaquid nebi quequin tantiec mëyante icnuc unësmene quenquiocquïn ëbi chuibanec tabadquid Nuquin Papa yacno tabadendac.

³⁶ Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic?

³⁷ ¿Nuquin Papa mitsana menecta abi yacno puduedpatsia? Padenquio.

³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid

chuiquin, Con utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chienquo iquendambi. Chuiquid dapa abipadquidquo con pan ëbi icmiac ëmbi abucshun uaido mayan bëdabobëdi nidaidën choaindabi. Adec aidobëdi choashun ëbi chieshënuquid isec, Con utsi nec, queoatiapimbo iquendabi –quepondash Esus cho-choquido caic.

9

¹ Aden chiashic Esus: –Nëbimbobi tabadquid ëbi tantiaquid utsi-utsiec unësabiqquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac –quepondash.

*Esus bëdaidquo icmiaid
(Mat 17.1-13; Duc 9.28-36)*

² Aden chuibanashic 5ted ushash: –Nidnu. Nid –quianec Esusbëd Petedo, Acobo, Uan, aitedi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash.

³ Abi dasiuidaid dashcute icboedi nac-nacquio yampac caondash.

⁴ Edias, Moises, aid daëd ënden yampidi Esusbëd onquesho ispac caondash Esusbëd choboedon.

⁵ Aden isequi: –Chuiquid Dapa, nuquibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aiteded icnuc –quepac caondash Petedo.

⁶ ¿Atotsimbi chuipe? quetiapimbo yec
dacuëdcuededquin aden chuipac caondash
Petedon.

⁷ Adec tabadshobien abu ushu choquidën
ambo tabadquidtedi bêtimpac caondash. Aden
bëtinacnoëshquiobi Esus chiec onquiampac
caondash: —Esus, con madombo con
dayunquiocquid nec. Adquid icquin chuibansho
bëdamboen tantiata —capac caondash Nuquin
Papan.

⁸ Adsho isbanquin isaquien Esusbëd choboeduidi icoapac caondash.

⁹ Adanec macuësh yacnoësh budtanequi: —
Mimbi isboed nëbi chienda. Èbi Nuquin Papan
mado matsesacsho unësmiac ëbi uincuenan mimbi
isboed chuita —capac caondash Esusën.

¹⁰ Adsho tantiash utsi chienquio yec abi uincuemete ¿mitsipadquio icpec? quec abibi onquecuededpac caondash Esusbëd choboedo.

¹¹ Adec onquecuededash: —Nuquin Papan
chomiaidquio choabicnuc Ediasba choendac
quequin tsusedpabon nadomboen nata quequin
chiaid tantiaquidon chuibanec. Ma Edias
ëndenquimboshë chopampic —quepondash abëd
icquido Esus caic.

¹² Adoaquien: —Ai, Ediasën matses bëdamboen
tabadmenuen chiampidpadquidba choendac
quequin Nuquin Papan chiaid nendac. Adembidi
Nuquin Papan chomiaidquio yec matsesash nëbi
tabadsho matsesën chieshënquin mëyanendac
quequin chuipampid nec.

¹³ Ediasën chiampicpadquiec Uan acten
mentoanquid chopondash. Aidi choacsho abi

bunacpadomboen abi chieshënquidën mëyanac. Ëndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash –quepondash Esus abëd icquido chiec.

Mayan icsan buëd onquetiapimbo icmiaid Esusën bëdamiaid
(*Mat 17.14-21; Duc 9.37-43*)

¹⁴ Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpondash.

¹⁵ Adnubien Esus chosho isash iccuededquido, Bëdämianquid choec. ¿Atotsi aidën napatsiashe? Isnu, quetanec titingue choec: –¿Ada cho? – quepondash.

¹⁶ Adoaquien: –¿Atotsi quec ëbëd icquidbëd comapenec onquecuedede? –quepondash Esus.

¹⁷ Adshobien: –Chuiquid Dapa, mibi ismenuen con mado bëombi. Mayan icsan buëd oncamenquio yaid nec.

¹⁸ Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh –quepondash mayan icsan buëd onquetiapimbo icmiaidën papa.

¹⁹ Aden chuisho tantiash abëd icquido caic: – Esus nadatambocquid nec quequin ëbi tantiesa

mibi nepec. ¿Tedectsi icshun ëmbi chiacpaden mimbi tantiabempe? Mibi tantiesa icsho ¿mitsipadembimbi tantiamepe? —qeshumbic: —Madompi bec cho —capondash Esusën.

²⁰ Adsho tantiashun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëcbacush-ëcbacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tantianu —quepondash Esus madompin papa chiec.

Adoaquien: —Bacuë ictsequi ad iccondash.

²² Cuëte dëtsiadaid nënedeniosh abi dapuduedaidën. Actetsen nënedeniosh unësmenuequin. Mibi bédamequidquio icquin ëbëdta tantiaquin ëbi con mado bédameshun —quepondash madompin papa Esus caic.

²³ Adoaquien: —¿Mibi bédamequidquio icquin ëbi con mado bédameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac —quepondash Esus.

²⁴ Adsho tantiash: —Tantiembi. Ëmbi abimbo tantienquiocsho isun ëbi tantiamé, Icbo —quepondash madompin papa Esus caic.

²⁵ Adsho tantiashun matses dadpen titinquec chosho isun mayan icsa chuiquin: —Matses buéd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquio yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien

unësacimboec madompi uesho isash: —Unësosh —quepondash isquido.

²⁷ Adnubien madompi mēdintanquin Esusën uëtsëndopondash. Adoac abembi nidtopondash.

²⁸ Adnubien shubun puduedacsho: — ¿Atotsieshumbimbi mayan icsa dapuduetimbo apimbo icpo? —quepondash abēd icquido Esus caic utsibon tantienquiocnobi.

²⁹ Adoaquien Esus: —Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

*Abi unēs uate chuioaid
(Mat 17.22-23; Duc 9.43-45)*

³⁰⁻³¹ Aden chianec nidaid Cadidia caid matanec nidpondash. Nidquimbi, Ēbēd icquid 12tedtsēqui chuibanu, quec utsibo ismenquio yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecshenda adec Esus onquepondash.

³² Aden chuisho bēdamboen tantienquio yequi dacuēdec ēbi bēdamboen tantiamequin chui queti-apimbo icpondash abēd icquido.

*¿Mitsicquid chuiquid dapa icpec? quequin chiaid
(Mat 18.1-5; Duc 9.46-48)*

³³ Adanec shubu dadpen icquid Capednaun caid yacno Esus choapondash. Adec choash shubun

puuedshun: —¿Podquedën choec atotsi chiec onquecuededo? —capondash Esusën abëd icquido chuiquin.

³⁴ Adsho tantiash cuëdenquioçpondash abëd icquido. ¿Esusbëd icquid mitsicquid chuiquid dapa icpeque? Tantianu, quec onquequin ambi chiaid chienquo yec tabadpondash.

³⁵ Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuëmpi abentsëc mëdintanquin abëd icquid tabadacno nënantanquo tsadumbudpondash. Aden tsadumbudshun bacuë icuquequi:

³⁷ —Esus tantiaquid nebi quequin ismequin bacuë yuedquin nashunquid ëbi yuedquin nashunacimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacimboecquid neoaindac —quepondash Esus abëd icquido chiec.

Nuqui chieshënesa nuqui bëdamboen chuibanquid nec quiaid

(Mat 10.42; Duc 9.49-50)

³⁸ Adnubien utsin naid chiec Uan onquedopondash: —Icbo, mimbi chiacpadomboen utsin chuisho tantiapombi. Aidën: “Esus nadatiamboquin naquidquo nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun,

Esusböd icquidpenquo mibi neque. Adenda quequin chuipombi —quepondash Uan.

³⁹ Adoaquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec.

⁴⁰ Nuqui chieshënesa nuqui bëdamboen chuibanquid adquid nec.

⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

Icsa uanquin tantiabenabicquid ismequid cuidendac quiaid

(Mat 18.6-9; Duc 17.1-2)

⁴² Abi Esusën onquequin chuibanec: — Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta tëtaneshun acte dapa nënëpatecnëdan.

⁴³⁻⁴⁴ Adembidi mimbi icsamboen tantiaquin mishaid ëntiapimbocquin ismedeniac adomboembidi utsin tantiec. Bednu quenquo yec mëtaniacbimboec tsad ënëdenquo yec chian anëdënquiacno nidmane quiash.

⁴⁵⁻⁴⁶ Adecbidi capuquin mibi icsaid mimbi ismebeneque. Capunu quequin tantienquo yec tateshuniacbimboec tsadta ënëdenquo yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac.

⁴⁷ Adecbidi ëshën isec mibi icsaid ëntiapimbocquin mimbi ismedoniac adomboembidi utsin tantiec. Ëshë chicshuniac bimboec tsad ënëdenquio yec chian anëdënquiacno nidmane quiash ma mibi tsadacpadec mimbi ismiaid tsadoapanu.

⁴⁸ Icsa uadenequin ënenquio yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac.

⁴⁹ Sa casecac pambid batambo yac bimboec Esuspadquid icnu quiash mibi icsaid ënëdnuen mëmunec mibi bëdambo yampec.

⁵⁰ Sa batambocquid bëdambo iquec. Sa batambochoedi batapenquio yec icsasho ¿mitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta –quepondash Esus.

10

Aton chido bedshun nidmequid

(Mat 19.1-12; Duc 16.18)

¹ Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen chochoapondash. Adec cho-chosho isun Nuquin Papan chiaid chuibanoapondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu qeshun:

—Aton chido bedash bunenquio yanshun cuemec. ¿Aden naicta bēdambo iqueque? Tantuanu. Chui —capondash Esus chuiquin.

³ Adoaquien: —¿Atotsi quequin Moisesën chuipampic? —queoapondash Esus.

⁴ Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bēnēn dada uashun nidmiacsho isash, Padi, quenquiocpampic Moises — quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic.

⁶ Nadomboen Nuquin Papan tauapampic. Dada abentsēc uashumbic chido abentsēc bidi uashun dada menepampic.

⁷ Adomboembidi nanuec dada aton tita aton papabēd tabadenquio yec aton chido bedash abēdi ambi quēnē uaidēmbi tabadec.

⁸ Aden aton chido bedash tabadequi matses abentsēc icboedi daēdec. Matses daēd icboedi abentsēc yacimboec tabadec.

⁹ Aden dada aton chidobēdta Nuquin Papan daēd uacsho ma cuēshēdmenquio icpanuna — quepondash Esus.

¹⁰ Aden chiash shubun puduedacsho: —Mimbi chuiboed ēbitedi tantieme —capondash abēd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec.

¹² Adembidi chido aton bēnēn bedac aton bēnē nianshun dada utsi bedmequid Nuquin

Papan menepampid niacquin tantiesa neoaic
—quepondash Esus.

Esus yacno bacuëbo bë-beaid
(*Mat 19.13-15; Duc 18.15-17*)

¹³ Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon.

¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadom-boen tantiaquidquo bacuëbo neque. Adomboembidi badedquo Nuquin Papan chiaid tantiendac. Nuquin Papan shubu abentsëquën tabadquid aido nec.

¹⁵ Abimbo chiembique. Tantia. Nuquin Papan chiaid bacuëbon badedquo tantiacpaden tantiesa Nuquin Papa yacno puduedtiapimbo iquendac —quepondash Esus.

¹⁶ Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

Na dadpen icquid chiaid
(*Mat 19.16-30; Duc 18.18-30*)

¹⁷ Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamianquid, bëdambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

18 Adoaquien Esus: —¿Nuquin Papabëdtabidabi mibi bëdambocquid nec, ëbi cape mimbi? Nuquin Papauidsëqui bëdambocquidquo nec

19 —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidedi Nuquin Papan dada uamiampid nabanquidta ne? —quepondash Esus choboed caic.

20 Adoaquien: —Abimbo chiembique. Tantia, Icho. Aidedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

21 Adsho tantiaash, Aibdëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquo menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbëd iquec cho —quepondash Esus.

22 Adsho tantiaash choboed mamënenquio yec unësquio yec nidpondash con na menebantiapimbo iquebi quiash.

23 Adec nidsho isun abitedi bëisbanec Esus: —Aton na dadpen icquidën, Con na tantiequi

Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

²⁴ Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec.

²⁵ Adembidi shëcuën puduedte nidaidën capuquid dapan badedquo tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquo tantiatiapimbo iquec. Ambi tantiacpadequi puduedte bunec —quepondash Esus.

²⁶ Adsho tantiash abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbo noc ¿tsutsi puduedquid icpeba? —quepondash abëd icquido Esus chiec.

²⁷ Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbo noc Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tanta, Icho. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

²⁹ Adoaquien: —Abimbo chiembique. Tanta. Esusbëd icnu queshun Nuquin Papan shubu abentsëquën tabadte iquec quequin

chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbocsho

³⁰ daëd uaquin Nuquin Papan menendac. Nëbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yucash ënëdenquio yec Nuquin Papan shubun mibi tabadendac mibi chieshënquid nibëdacno.

³¹ Nidaidënshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac –quepondash Esus.

*Ëbi unës uaindac quequin Esusën chiaid
(Mat 20.17-19; Duc 18.31-34)*

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidoudtsëqui padpiden chuioanu —quiash Esus niduntshun cho-chosho isquin naden abi mëyante chuiquin tauapondash:

³³ —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bed-

shun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec on-quecuededash, Icsambocquid Esus nec. Unës uamequimbien ictiad, quendac ëbi caic. Adec on-queshun ëbi buanshun isadaidpembo ancaquid ëbi meneoaindac.

³⁴ Aden meniac bedshun aidon ëbi oncain mamënshumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi — quepondash Esus abi uincuenta ambibi chiec.

*Ëbi daëdi nashunta Acobo Uambëd quiaid
(Mat 20.20-28)*

³⁵ Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadomboen ëbi daëdi nashunenquioda mimbi icpe? —quepondash.

³⁶ Adoaquien: —¿Atotsimbi mibi nashuneque? Ëbi chui. Tiantianu —capondash Esusën.

³⁷ Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta — capondash Uanën Acobobëdtan Esus chuiquin.

³⁸ Aden aid daëdshun chiaquien: — Tantienuiocquin mimbi chiec. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

³⁹ Adoaquien: —Ai, adquid tantiembi — quepondash.

Adoquien: –Ai, adomboembidi mimbitsen tantiendac –quepondash Esus.

⁴⁰ Aden chiec abi onquec: –Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec –quepondash Esus Uambëdta Acobo chiec.

⁴¹ Aden Esusën chiaqui abëd icquidquio utsitedi Acobobëdtan Uanën chuiboed tantiash nëishcuededpondash.

⁴² Adec nëishash tabadsho isash: –Cho –quepondash Esus. Aden chomiash: –Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec.

⁴³ Aden namesa mibi nec. Chuiquid dapa icnu quiash utsi nashunquid icta.

⁴⁴ Adecbidi tsusio icnu quiash yuabimboe yec utsin namiaid icta.

⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi –quepondash Esus.

*Bëshuaid, Badtimeyo cuëmëdquid bëdamiaid
(Mat 20.29-34; Duc 18.35-43)*

⁴⁶ Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudu-anash nidquin isaquien bëshuaid, Timeyon mado,

Badtimeyo cuëmëdquid podqued cuëman tsadpondash. Piuquid bednu quequin cainec podqued cuëman tsadpondash.

⁴⁷ Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun — quequin chiec cuëdpondash bëshuaid.

⁴⁸ Adec cuëdsho tantiaashun: —Esus cuënenquio yec otacquio tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoquien: —“Chome,” queque. Nidtoash nid —capondash utsibon.

⁵⁰ Adsho tantiaash bëshuaid aton dashcute bëntsecquid chicanec badedquio nidtoanec Esus yacno chopondash.

⁵¹ Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icho —quepondash bëshuaid.

⁵² Adoquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiodpondash bëshuaidën. Adec bëdanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid

(Mat 21.1-11; Duc 19.28-40; Uan 12.12-19)

¹ Adec nidequi Edusaden anoentsëqui Esus cho-pondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidtedi macuësh Odibos caid pot-sembo icpondash. Ambo choash ëbëd icquid daëd shubuno nidmenu quequin tantiec nadpondash Esus:

² —Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tēchicshun sananquin bëta.

³ Aden bedsho isun, ¿Atotsi canun aid bede? cac, Bëoaambi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

⁴ Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tēchicpondash.

⁵ Aden tënëshaid tēchicsho isun: —¿Mitsipaden tantiaquin ëmbi tënëshaid mimbi tēchiqueque? Tantiyanu. Chui —capondash anocquidën.

⁶ Adoaquien: —Tënëshaid tēchicshun bëta, con icbo quebocpaden naimbi —capondash tēchicquidën.

Adoaquien: —Buanec nid —queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid aidën catsadtonoeshun. Adoaidën Esus catsadtopondash.

8 Adembidi chuiquid Esus nec quequin ismequin utsibontsen aton dashcute bëntsecquid chicbededshun podqued ansambampondash ma chuiquid dapa bēdamboquid capunueshun. Adembidi tantiaquin utsibon budēdbiecquid podo tebededshun podqued ansambanoapondash.

9 Aden ansambanash matses dadpen bēyucanec nidanenubi Esus nēnantanquio nidnuc aidtedbidi tsyuec choquin tsibambēpondash. Adec abitedi nidanec Esus tantiec nadec cuēdēncuededpondash: —¡Adeduya! Nuquin Papan bēdambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuēmēdquidēn tsyuecquid, shubu abentsēqui tabadquido chuiquid dapambo choec nec.

10 Ēbi chuiquid dapa Nuquin Papan abuc tabadquidēn chomiaid Esus nec. Nuquin Papa bēdambohē iquec. ¡Adeduya! —quec cuēdēncuededpondash Esusbēd nidquido.

11 Adec cuēdēncuededequi Edusaden yacno chochopondash. Choashic Nuquin Papa tabadte shubu uashunaid quēnē dadpen yacno nidash Esus puduedpondash. Adec puduedshun abitedi isbanash ushē budtsambi Betania caid yacno nidaneopondash Esus.

Cuēte bacuēsa chiaid
(Mat 21.18-19)

12 Abadiadtsashi Betania yacnoēsh nidanec Esus bundopondash.

13 Adec bundoshombi cuēte icueda caid podo buntac-buntacpambo ancuenquio

nidsho istuidec Esus: –Icueda podo buntac-buntacpambo podoash nideque. Isbono. ¿Bacuëashida neque? –quianec nidpondash. Adec nidquimbi icueda podouidquio icsho ispondash. Ushë utsin bacuëtiadquidi bacuëabi podopac.

¹⁴ Ad icsho isun Esusën: –Adequi bacuëesa icsho ma matsesën chenquio icpanuna –capondash. Aden chuisho tantiapondash abëd icquidon.

*Nuquin Papa tabadte shubu uashunaid yac-noshon cuemiaid
(Mat 21.12-17; Duc 19.45-48; Uan 2.12-22)*

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash.

¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: –Nuquin Papa tabadte shubu uashunaid neque. Adec nasiadec capuenda –capondash Esusën chushcaquin.

¹⁷ Aden chushcasic: –¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc –quepondash Esus.

¹⁸ Aden Esusën chuisho tantiash, Icsambocquid Esus neque. Unës uatiad, quequin ambibi tan-

tiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo.

¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid
(Mat 21.20-22)

²⁰ Abadiadtsashi Edusaden yacno nidoaquimbi cuëte icueda caid bidiquiacsho istuidpondash.

²¹ Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chui-boed bidiquiaie. Is, Icho —quepondash.

²² Adoaquien Esus: —Nuquin Papa nadatiambocquin nabanquid nec, quequin tantiaquiota.

²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiechidi acte nantan tabadoata, mimbi cac nëid macuësh acte nantan tabadoaindac.

²⁴ Embi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac.

²⁵ Aden Nuquin Papa chuinish mibi utsin ic-sambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac.

²⁶ Adenquio mibi icsho isun Nuquin Papan mibi icsa uanaid bēpiscudenquiocquin mimbi chiaid tantiatipimbo iquendac —quepondash Esus abēd icquido caic.

*¿Mitsicquidēn chuibanta caid mibi ne? quiaid
(Mat 21.23-27; Duc 20.1-8)*

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidēn puduedash capusho isash isadaidbo tsusiobo:

²⁸ —¿Mitsicquidēn chuibanta cac chuiquid dapabimboecquin mimbi chieque? Tantianu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidēn, Uan padon Nuquin Papan chuimiapadomboen nabanquinda nadiondash? Padenquio, quequin, ¿Ambibi tantiapadomboen Uan padon naondash, quequinda mimbi tantiapeque? En chui. Tantianu. Aden mimbi chiac ěmbitsen mibi chiembi —capondash Esusēn tsusiobo chuiquin.

³¹ Aden Esusēn chuisho tantiash udictsēc nidash isadaidbo tsusiobo onquec nadcuededpondash: —Nuquin Papan tantiamiapadomboen Uan padon naondash, nuqui quesho tantiash, ¿Atotsieshun aidēn chiaid tantienquio icconda? quetsiash Esus.

³² Naden Uan padon ambi tantiapadomboen naondash, nuqui quesho tantiashun, ¿atotsi napatsiash Uanēn chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuēnoten seshunetsiash —quecuededpondash.

33 Aden chiec onquecuededashic — ¿Tsuntsin tantiamiacpadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiec.

12

Tied icbo nashunta quequin chiaid (Mat 21.33-46; Duc 20.9-19)

¹ Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquo nitsinshun cueste bënitsinaidën otadnidec cuidiancuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuctsucte nacnemposh. Aden nacnenshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

² “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh.

³ Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh.

⁴ Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestasquin aidtsen aton icbo yacno nidmeoaposh tied icbo nashunquidon.

⁵ “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cunesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cunesuneposh.

⁶ “Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

⁷ “Aden nidmiac ancuenquio chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cunesunenuna, quecuededposh tied icbo nashunquido.

⁸ “Adec onquetanquin aton icbon madombot-sen bedshun cunesuneshun daquënë uaid mabudacquin nebudposh.

⁹ Adoacsho tantiashun ¿atotsi tied icbon napec? Naden naindac. Utsibëd aton tied yacno nidshun abi nashunuidboed cunesuneshun utsibo abi nashunquido icmendac —quepondash Esus.

¹⁰ Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.
“Shubu uanuequidën buintad isuidaidi utsin abia nitsinaid icoaposh.

Adquiobidi Nuquin Papan chuimiaid matsesën tantiauidaid iquendac.

¹¹ Nuquin Papan naid bēdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidēnquio tantiec”

—quepondash Esus Nuquin Papan chiampidquio chiec. Nuquin Papain shubu abentsēquēn abi tantiaquido yuedanquid nendac, quequin utsi chiacbimboec abibi chiadquin Esusēn chuibampondash.

¹² Adsho tantiaish, Ēbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpēnshun tantiabededpondash. Dadpen icsho isash dacuēdcuededec Esus bednu quenquio yec nidanepondash chieshēmēnquido isadaidbo tsusiobo.

Bec cho quequin bedshunquid nec, quequin chiaid

(Mat 22.15-22; Duc 20.20-26)

¹³ Isadaidbo tsusiobo nidshun padiseyobo edodesbobēdta istuidshun: —Nēidon Esus icsamboen chuimetsiash —queshun aido Esus yacno nidmepondash.

¹⁴ Aden nidmiac Esus yacno choshon abentsēcshun Esus nadopondash: —Ambia tantiaquid, matsesën tantiamicpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ēbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad

cuëmëdquid nec. ¿Aden meniaid bēdambo iquec, quequin Nuquin Papan chiaidta nepec?

¹⁵ ¿Adambi menepeba? —quepondash padisey-obobēd edodesbo Esus caic.

Adoaquien, Ēbi icsamboen chuimenuc adec onquec, quequin ambibi tantiec: —Shocosh piuc-quid bec cho ma isnu —quepondash Esus.

¹⁶ Adsho tantiashun bēpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tiantianu —capondash Esusën.

Adoaquien: —Isadaidpembo ancaquid, Sesad-bimboecnuc dada uaid nec —quepondash.

¹⁷ Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icbo icquin, Nata, cacpadomboen naban —capondash Esusën.

Aden bēdamboen chuisho tantiash, Bēdamboenshenda tantiapec, quequin ambibi tantiec Esus chieshënquido tabadcuededpondash.

Abuc tabadequi, ¿mitsicquidën chido neque? chui quiaid

(Mat 22.23-33; Duc 20.27-40)

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash:

¹⁹ —Moisesën dada uapampid nad iqueque. Tania. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec —quepondash saduseyobo.

²⁰ Aden chuishumbic: –Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash.

²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën

²² aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash.

²³ Adec unësash abuc tabadequi, ¿Mitsicquidën chido aid icpatsiashe? Chui. Tantianu – capondash saduseyobon Esus chuiquin.

²⁴ Adoaquien Esus: –Nuquin Papan chiaid mimbi icsamboen tantiec. Adembidi ambi nada-tiambocquin naid mimbi icsamboen tantiaoaic.

²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac.

²⁶ Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtempi abibi nëdënqesho istanec nidtuidquin nadec Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën.

²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën

Papa nebi quesa Nuquin Papa nec. Nami chodquiaid icquin Nuquin Papa tantiatipimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac –quepondash Esus matses uincuenta iquec quequin saduseyobo tantiamenuc.

Naden nata quequin chiaid ¿mitsicquid adquid-padquid utsi nibëdpec? quiaid

(Mat 22.34-40)

²⁸ Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantias Esus icsamboen chuimenuc aidtsen: –Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? –quepondash.

²⁹ Adoaquien Esus nadpondash: –Nëid chiaidpadquid utsi nibëdeque. Chuinu. Tantia. “Nuquin Icbo Nuquin Papa nec. Nuquin Icbo Abentsëcquiobi iquec.

³⁰ Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquo yec Nuquin Papa bunacpadquiec icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota.

³¹ Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi

nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec –quepondash Esus.

³² Adoaquien Esus icsamboen chuimenu ec choboed nadpondash: –Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec.

³³ Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac –queoapondash choboed.

³⁴ Aden choboedën bëdamboen chuiasho tantiash: –Nuquin Papan shubu abentsëquën tabadaid mimbi bëdamboen tantiatsempoc –quepondash Esus.

Adoac Esus icsamboen chuimenu quetiapimbo icpondash utsibo.

*¿Tsuntsin mado Quidistu nepec? quiaid
(Mat 22.42-46; Duc 20.41-44)*

³⁵ Abi icsamboen chuimenuequiv utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: — Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu.

³⁶ Naden Nuquin Papan Mayanën Dabid chuimiampic:

“Icho utsi icsho mibi chiembique. Tantia, mado, quequin chiec Icho Dapa nadpampic:

Ëquë con dayun abiucquio cainec tsadec cho ma mibi chieshënquidtedi mimbi namiaid ma icpanu,”

quequin chuipampic.

³⁷ Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidën icbo yec ¿mitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bëdamboen chiec, quequin comapenen tantiapondash.

*Nuquin Papan chiaid tantiamequidon chuisho
tantienda quiaid
(Mat 23.1-36; Duc 11.37-54; 20.45-47)*

³⁸ Aden tantamequimbi Esusën nadopondash: —Tsusedpabon nadomboen nata quequin chiaid tantamequidën chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquo yec tsusiobimboec isadnu quiash aton matses dadpen yacno capuquid nec.

³⁹ Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic.

⁴⁰ Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

*Nuquin Papa tantiaquin nianten meniaid
(Duc 21.1-4)*

⁴¹ Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sandosandonobi

⁴² aton na daëdpactsëcquidquo niantte choquimbi aton shocosh piucquid daëdquiobictsëcquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nadopondash: —Abimbo chiembique. Tanti. Niante aton na bedtequid dayun uanu quenquioctscquin Nuquin Papa tantiaquioquin sandoquidquio nec utsibon aden sandoenquiocnobi.

⁴⁴ Utsibon aton na bedtequid dadpen uesenquiocquin sandobededposh. Aido daëdpactsëc icquid sandoacbimboen sandoquido nec quequin tantiemi. Adquidpenquio niante nec. ¿Bednun tedtsimbi dayunoape? quenquiocquin aton na daëdquiobictsëcquidi nibëdquiocnoc sandoposh nianten. Dadpen icquid sandoacbimboen sandosho aid isembi —quepondash Esus.

13

Nuquin Papa tabadte shubu uashunaid chicchicte chiaid

(Mat 24.1-2; Duc 21.5-6)

¹ Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaid bëdaidquio iqueque. Is, Icho —quepondash abëd icquid abentsëc Esus caic.

² Adoaquien: —¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chiac nibëdquiendac —quepondash Esus.

Abitedi naimbudte tauanun ismete chiaid

(Mat 24.3-28; Duc 21.7-24; 17.22-24)

³ Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo,

Acobo, Uan, Andedes aited icpondash. Utsibon tantienquiocnoc aidon:

⁴—Cuënote nacnenaïd nebudte mimbi çhuïboed çmitsipadën nebudte icpeque? Tantianu. Èbi chui. Adembidi aidi tauanun ismete çatotsi icoapeque? Tantianu. Aid chuïoa —capondash.

⁵ Adoaquien Esusën nadopondash: —Muaquin chiaïd tantiamane qeshun Nuquin Papan chiaïd isban-isbanquiota.

⁶ Nuquin Papan chomiaïd nebi quec muaquïd cho-choendac. Aid chosh, quequin chiac utsin-utsinquien, Abimbo caic, quequin tantiabededendac.

⁷ Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac.

⁸ Ai, adquïo iquendac. Adashic abëd tabadquïdobëdi cuesnancuededendac. Adecbidi abi ancaquïd dapan, Cuestan, quequin nidmiac nidaïd utsin icquïdobëdi cuesnancuededoaindac. Adecbidi utsi-utsiec yacno nidaïd ishçudendac canchednuec. Adecbidi bunquïote iquendac. Aïdtedi icsamboshëcquïd taëyendac.

⁹ “Adquïd yanubi Nuquin Papan chiacpadom-boen nabanec tabadta. Mibi bedshun, Icsambocquïd neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaïd chuïbante shubuno buanacsho nuqui tsusiobon cuesendac. Adembidi bedshun isadaïdpembo ancaquïd dapabo yacno buanaqui mimbi tantiaïd Nuquin Papan chiaïd

mimbi chuibanendac.

¹⁰ Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec.

¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui çatotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

¹² “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquin adembidi aton titan chiaid niacoquin cuesunemendac.

¹³ Esus tantiaquid chieshënuquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshënuquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushe quiash anoentsëqui icquido cuenenquiochoedi ma cuempununa. Abimbo chiembique. Bëdamboen tantiata caimbi.

¹⁵ Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquio

yec cuenta.

¹⁶ Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquio yec badedquio cuenta.

¹⁷ Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta.

¹⁸ Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu.

¹⁹ Comapenen Nuquin Papa chieshënquin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac.

²⁰ Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac.

²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta.

²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiambocquin nabanendac. Adosho isun ëbi tantiaquidëmbi utsin-utsinquien tantiauidtsendac adquid.

Nuquin Papapenquio aid nec, quequin Nuquin Papambo tantiata.

²³ Ad iquendac quequin chiombique. Ad icnuc chieshenquiocquin Nuquin Papan chiaid tanti-aquiota –capondash Esusën.

Nuquin Papan madombo choaid
(*Mat 24.29-35, 42-44; Duc 21.25-36*)

²⁴ Aden chiash abi onquec: –Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac.

²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanashëd icquido ¿mitsimbo nuqui cuempeba? quendac.

²⁶ “Adnubien Nuquin Papan madombo matse-said ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën.

²⁷ Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido – quepondash Esus.

²⁸ Aden chiashic: –Abi chiembique. Tantia. Suc seccuduquiac nëbi cunquecuenec, quequin matsesën tantiec.

²⁹ Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta.

³⁰ Abimbo chiembique. Tantiata. Ęmbi chuibamboed naimbudabicnuc Ęmbi chuibamboed tantiaquidĕn tsyuecquido naimĕdbudenquio iquendac.

³¹ Aden matsesĕn isnubien nidaidbĕdi abu ĕnĕdendac. Ęmbi chiaidtedi abimbo yec adquiouidi iquendac.

Nĕid ushĕnquio tauadoendac, quetiapimbo mattses iquec quiaid

³² “Adnuc nĕid ushĕnquio Nuquin Papa chieshĕnquin tauaindac quetiapimbo mattses iquec. Ambi uaido mayan bĕdabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsĕcquiobien adquid tantiaquid nec.

³³ Aid tauadote ushĕ choaid tantiatiapimbocquin Nuquin Papan chiaid niacmane qeshun isbanquin nabanta.

³⁴ Nad iqueque. Tantia. Chuinu. Utsibo yacno nidnun abĕd tabadquido naden chuiposh. Min utsibo chieshĕnenquiocquin shubu isquid icta quequin chianec nidposh.

³⁵ Adec icbo nidan abi choate ushĕ mimbi tantienquio iqueque. Bĕshunenquiocquin tantiaquiota. Inchĕshbudtsĕqui choapatsiash, quequin tantiata. Adembidi inchĕshpotsembo chopatsiash qeshun adembidi tantiaquiota. Adembidi, cachina cuĕdanubi chopatsiash, qeshun isucunshun tantiadenequiota

³⁶ Ęmbi tantienquiocnoc con icbo chochitondac, qeshun.

³⁷ Adquiecbidi bĕdamboec tabadquin Nuquin Papan chiaid isted-istedta Nuquin Papa

chieshënquidën niacmenushe qeshun —
quepondash Esus.

14

Esus cunesunete bunaid chiaid
(*Mat 26.1-5; Duc 22.1-2; Uan 11.45-53*)

¹ Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cunesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash.

² Aden nibë nec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaidbo tsusiobo.

Esus unësec qeshun nacbimboen noadte machiuinte chiaid
(*Mat 26.6-13; Uan 12.1-8*)

³ Adnubien Betania caid yacno tabadquin Esusën Simonën shubun puduedshun pepondash. Simon daushacbimboecquid, nami mishac tantiadenquiocquid icsho Esusën bëdamiaid nepondash. Adec puduedshun pec tabadnubi comapenec noadquid bëec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

4 Aden machiuinsho isash utsibo nëishun: —
¿Atotsieshun machiuino?

5 Noadte menequin piucquid dadpen bedshun
aton na nibëdquid dadpen menetsiandac —quec
onquecuededpanëdash Esus machiuimboed chido
chushcaic.

6 Aden chushcasha tantiashien Esus onquec
nadpondash: —Chushcainda. ¿Mitsanada nediosh?
Ambi noadte machiuimboed bëdaidquio nec.

7 Badiadquidën-badiadquidënquieç ënëdenquio yec
aton na nibëdquid ënabi iquec. Aidi menenu
qeshun mimbi menepec. Èbien nashuntiapimbo
iquendac.

8 Èbi unësabicnuc nëid chidon tantiaquin choco-
canuequin nacbimboen noadte machiuimpaboc.

9 Abimbo chiembique. Tantia. Nuquin Pa-
pan shubu abentsëquën tabadaid chuiquimbi ëbi
machiuimboedën naidtsen tantiaquidon chuiben-
chuibenendac —quepondash Esus.

Esus bedmembali, Udas quiaid
(Mat 26.14-16; Duc 22.3-6)

10 Adnubien Udas Iscadiote, Esusbëd icquid
abentsëc, Esus bedmenu, quianec isadaidbo tsu-
siobo yacno nidpondash.

11 Adec nidequi isadaidbo tsusiobo yacno
choshon Esus mibi bedmembali quequin
chuituidac bëdambo icpac caondash aido.
Adembidi: —Esus ëbi bedmesho isun piucquid
mibi menembali —quecuededpac caondash. Adsho
tantiash nidanec, ¿Mitsipadentsimbi bedmepe?
quec tabadquin caimpac caondash Udasën.

*Nidaidën capuquidded cuesuniaid aböd
icquidobëdtan piaid*

*(Mat 26.17-29; Duc 22.7-23; Uan 13.21-30; 1Cod
11.23-26)*

¹² Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiemi nacenpatsia? —quepondash Esusböd icquido.

¹³ Adsho tantiash Esus aböd icquid daöd chiec nadpondash: —Edusaden yacno nidquimbi dadan acte bësho istuidash tsibananec aibdëdi nidta.

¹⁴ Aden aid tsibanec puduedash, ¿Ëbi tabadte quënë mitsimbo iquec? ëböd icquidobëdtan penu, quiosh chuiquid, quequin shubu icbo chuita.

¹⁵ Aden chiac buanshun dectatomesun abuc quënë dapa mibi ismendac. Ambo pete sante cuate iquendac. Ashunquio penun nacenata — quepondash Esus ambi daöd chuimiaid caic.

¹⁶ Aden chiac aböd icquid daöd Edusaden yacno nidquin Esusën chiacpadomboen bëquedshun tsibananash puduedshun penun nacenpondash.

¹⁷ Adnubien inchëshbudtsëqui aid daëdtsëqui yacno Esusböd icquid utsibo chopondash.

¹⁸ Adec choash pec tabadnubien: —Abimbo chiembique. Tantia. Ëbëdtan pequid abentsëcshun isadaidbo tsusiobo ëbi bedmendac —quepondash Esus.

¹⁹ Adsho tantiash, Icsambo iquec, quequin tantiec: —¿Ëbida chienquio ique? —quepondash aböd icquidtedi.

²⁰ Adoquien: —Miböd icquid nebi, quec mibitedi. Padnuen abentsëcshun ëbëdtambi pete

cuëshën ënë punshun pequidën ëbi chieshënquido bedmendac.

²¹ Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Ëbi bedmequid icsamboshë iquendac. Abi cuidte icsamboshë icnushe queshun aidi tishenquiocpatecnëdan —quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piaid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac apondash.

²⁴ —Nëid acquin Esused Nuquin Papan cuidac aton intac siebudpamboec unësposh. Aton mado-ded cuidshun Nuquin Papan ëbi padenquio iquec quequin nëid acquin tantiata.

²⁵ Uba caid ënë nidaidënshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

²⁶ Aden chiash Nuquin Papan naid chiec cuëdënanec macuësh Odibos caid yacno nidoapondash.

Esus tantiesa nebi quequin Petedon chuite ch-aid

(Mat 26.30-35; Duc 22.31-34; Uan 13.36-38)

²⁷ Adshumbic Esusën: —Esus tantiaquid nebi quesa mibitedi nendac. Nuquin Papan chiampid-padquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëndac,”
quequin Nuquin Papan chuipampid nec.

²⁸ Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

²⁹ Adoquien: —Esus tantiaquid nebi quenquo utsitedi icnuc ëbien padenquo iquec —quepondash Petedo.

³⁰ Aden Petedon chuisho tantiash: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

³¹ Adsho tantiash: —Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquo iquendabi —quepondash Petedo comapenec onquec. Adecbidi Esusbëd icquidtedi onquepondash.

*Quetsemani caid yacno choash tabadaid chiaid
(Mat 26.36-46; Duc 22.39-46)*

³² Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinec udi nidebique. Nëmbobi tabad —quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestededi icsaid cuidtequid ëmbi bedshunsho isun Nuquin Papan

ëbi istiapimbo iquec, quequin tantiec unësquioshë yampondash.

³⁴ Adquio iquec: —Ëbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec.

³⁵ Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec.

³⁶ Aden chuishumbic: —Papa, mimbi natiapimbo ictequid nibëdec. Adquid icquin mates cuidtequid bedshunquid con mado icmenquio iquembi qeshun mimbi adoenuioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: —Simon, ¿ushectane? ¿Ëbibi chieshmane quiash yuecpectsëc iquec ushenquio yec tabadtiapimboda icco?

³⁸ Chieshmane qeshun Nuquin Papa chuita Nuquin Papan chiaid niacmenuequidën Satanas caidën chiaid tantiamane qeshun. Chieshenquio iquebi quiash dacuëdash badedquio mibi chieshendac —quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash.

⁴⁰ Adtanec choashumbic abëd chobedo adecbidi ushacsho istuidoapac caondash. Ushcasquiec tabadec, Ushenquioccobi, quequin

chuitiapimbo yec otacquoio tabadpac caondash.

⁴¹ Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquoio yec isucun. Nuquin Papan madombo chidon tishac matsesaid ëbi icsho nëbimbobi ëbi chieshënquidon bedmeque.

⁴² Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

Esus bedshun buante chiaid

(Mat 26.47-56; Duc 22.47-53; Uan 18.2-11)

⁴³ Aden chuinubien Esusbëd ichoedquiobi Udasbëd matses dadpen cho-chopondash. Cho-choquid utsi-utsiec chështe sanampamboec chonobi utsi cuate sanampamboec chopondash. Aided Udasën chiac isadaidbo tsusiobon chomiaido nepondash.

⁴⁴ Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bëdamboen ista —capac caondash.

⁴⁵ Aden chiashic aidobëdi choquimbi: —Icbo —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash.

⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, qeshun utsin cuate sananubi utsibon chështe sananec ëbi bedecta cho-choec ne?

⁴⁹ Badiadquidën-badiadquidënquiec Nuquin Papa tabadte shubu uashunaid umanuc

daquënë uaidën tabadquin matses tantiamenuen chuibanioni mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic.

⁵⁰ Adec onquesho tantiashun cuenquin abëd icquidtedishun Esus niampondash.

⁵¹ Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi.

⁵² Aden bedac dasiuidte bëdaidquio nianec dadauidquio cuempondabi.

Isadaidbo tsusiobo iccuededacno Esus buante chiaid

(Mat 26.57-68; Duc 22.54-55, 63-71; Uan 18.12-14, 19-24)

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash.

⁵⁴ Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëec tsadpondash Petedo.

⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash.

⁵⁶ Abimbo chiacimboen dadpenshun chuibed-edpondash. Aden chuiquin abentsëcshun chiacpadomboen chienquiocquin utsin chuiopondash.

⁵⁷ Adnubien, Chuinu. Tantia, queshun Esusën chiacimboen utsi uain chuipondash utsibon.

⁵⁸ Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquoio isadnuc ëmbibi naindambi,” quequin Esusën chuipondash — quepondash utsi.

⁵⁹ Aden abentsëcshun chuinubi utsin aden chienquiocquin chuipondash.

⁶⁰ Aden chuisho tantiash isadaidbo tsusio dapa nënantanquoio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tantanu —capondash isadaidbo tsusio dapan Esus chuiquin.

⁶¹ Adsho tantiash ëcbedenquoio yec otacquoio nidsho isash: —¿Nuquin Papan chomiaidquoio, Quidistu caid, Bëdambocquidën mado nebi, quecta mibi ique? —queopondash isadaidbo tsusio dapa Esus caic.

⁶² Adoquien Esus: —Ai, aidi nebi. Nuquin Papan madombo matsesaid abuc nidoashic Nاداتambocquidën dayun abiucquoio tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-

dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui?

⁶⁴ Nuquin Papa icsamboen Esusën chuisho mimbi tantioc. ¿Midapaden mimbi chieque? Tantianu. Chui —capondash isadaidbo tsusio dapan tsusio utsibo chuiquin.

Adoquien: —Icsambo iqueque. Unës uametiad —quecuededpondash.

⁶⁵ Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Èbi chui. Tantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ëmbi tantiacmaidquio nec quiaid

(Mat 26.69-75; Duc 22.56-62; Uan 18.15-18, 25-29)

⁶⁶ Adnubien Petedo umanuc daquënë uaidën tsadnubi isadaidbo tsusio dapan yua chido chopondash.

⁶⁷ Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capondash.

⁶⁸ Adoquien, Esusbëd icquid nebi, quetiapimbo yec Petedo: —¿Atotsi mibi quepe? Tantienquio yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

⁶⁹ Adec Petedo ambo tsadsho chido yuaidën istuidtanquin padpiden: —Esusbëd icquidquo nëid nec —quequin anocquido chuioapondash.

⁷⁰ Adoaquien: —¿Aidbëd icquidtabi nedi? — quepondash Petedo.

Adnubien yuepactsëc yash: —Aidbëdi Cadidia yacnocquid mibi nec —quepondash ambobidi tabadquido.

⁷¹ Adoaquien: —Ëmbi tantiacmaidquo nec quequin abimbo chiembi. Ëmbi abimbo chienquo icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

⁷² Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioishi quequin tantiec unësqiuo yanec shubianquiopondash Petedo.

15

Pidato yacno nidshun Esus meniaid

(Mat 27.1-2, 15-31; Duc 23.1-5, 13-25; Uan 18.28-19.16)

¹ Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpembo ancaquid Pidato caid menepondash.

² Aden meniac Pidato: —¿Isadaidbo ancaquidta mibi neque? Ēbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc — quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquoio yec Esus tsadpondash.

⁴ Adec tsadsho isun: —¿Ēcbedanenquoio yec otacquioda tsade? Mibi icsaid dadpen nëidon chuibanec —Pidaton caqui

⁵ adquiecbidi Esus tsadpondash. Adec tsadsho isash ¿Mitsipadquidquoio Esus nepec? Utsimbien, Icsapenquiocquid nebi, quequin chuipec, Aden chienquoio Esusën iquec, quequin ambibi tantiec Pidato tsadpondash.

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec.

⁷ Aden chuidenequin ambi quënën nauedmiaid Badabas cuëmëdquid nepondash. Aidëmbi utsi-bobëdtan Domanobo bunenquiocquin cuesquin tauasho isun bedmeshun quënën nauedmepac caondash.

⁸ Adnubien Pidaton seta utsin quënën nauedmiaid abentsëc ambi nidmiondacadpen nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën

nauedmiaid abentsëcta mimbi nidmepatsia — quecuededpondash aido Pidato caic.

⁹ Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash.

¹⁰ Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash.

¹¹ Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen.

¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³ Adoaquien: —Cueste nitsinshun dectan — quec comapenec cuëdcuededpondash isadaidbo.

¹⁴ Adoaquien: —¿Atotsi icsa uaosh? — quepondash Pidato.

Adoaquien: —Cueste nitsinshun dectan — queoaic comapenec cuëdcuededpondash.

¹⁵ Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe qeshun Badabas nidmepondash. Adshumbic: — Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamëns humbededaid chiaid

¹⁶ Adoac Esus bedshun Pidaton shubu amanuc daquënë uaid yacno sondadon buampondash.

Aden buanshumbien sondado utsibo 600ted icnuc chomepondash.

¹⁷ Choshon dashcute abichobicquid bēdaidquio bedshun ancanquid dasiuidacimboecnuc dasiunshun pinchuc-pinchucquid mauete uashun Esus matoncashun

¹⁸ ancanquid cuēnacpaden cuēnec: –Mibi isash bēdambo iquebi. Isadaidbo ancaquid dapa caid mibi neyoc –quequin Esus oncaic onquecueded-pondash sondado.

¹⁹ Adoquimbi ancanquidēn sanante cuate bēdaidquiobimboecnuc sananquin sondadon abentsēcshun-abentsēcshunquien Esus macuestanquin dacuishtucabudniash Esusēn taēno danēshēn sebudash uepondash.

²⁰ Aden mamēnshumbedequin mēyanshun dashcute bēdamboquid ambi dasiuimboed dachicshun aton dashcutebi dasiunshun cuesten dectanuequin Esus buampondash.

Esus cuesten dectante chiaid

(Mat 27.32-44; Duc 23.26-43; Uan 19.17-27)

²¹ Aden abi dectante cuate Esusēn buanti-apimboconoc nidquimbi abi datanquid cuate chidatometanquin buamepondash sondadon. Abi datanquid Sidene caid yacnocquid nēbi Edusaden caid dēuequiacnoēsh choquid nepondash. Adecandedo, Dupo chedon papa Simon cuēmēdquid niondash.

²² Aden cuate Simonēn buanubi macuēsh Codocota caid yacno abitedi chopondash. Macuēsh mapi canitebimboecsho Codocota quequin isadaidbon aton onqueten cuēmpondash.

23 Ambo choshon uba sicaid paëacsho paëmbocquid dauë cacushtanquin meniac aquenquiocpondash Esusën.

24 Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëchun sandoshon cadotanëquin dada uatsaidëmpi puduemaiid isbanquin Esusën dashcute bedbampondash.

25 Ushë dectatoec 9 yanuc Esus cuesten dectampondash.

26 Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiapaden dada uaid nepondash.

27 Cuesunetanquin ampequid daëd ëquë dectambudcuenshun nënantanquio Esus dectampondash.

28 “Dectanquin icsaquidbëdta dectanendac,” quequin Nuquin Papan chuimiampicpadembi napondash.

29 Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënshumbededpondash. Adec cuenquin mamënshunquin: —Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque.

30 Abimbo chuiquid yec unëstiapimbocquid nebi quianec mibibi budta —cabidanepondash.

31 Aden cuenquidën chuinubi adembidi

isadaidbo tsusio dapabotedi tsusedpabon nadomboen nata quequin chiaid tantamequid chedo onquecuedec: —Utsi-utsien bēdamequimbi utsi unēsacsho uincuemeboed yec mētoccaid abembi chiquidtiapimbocquid nec — quepondash isadaidbo tsusiobo Esus caic.

³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidēn mamēnshunubi abēdta dectanaidēn adembidi chuoapondash.

Esus unēs uate chiaid

(Mat 27.45-56; Duc 23.44-49; Uan 19.28-30)

³³ Adnubien ushē cuembocnoc 12 yanan inchēshquio icboedi ushē budec 3 yanuc uēshēmbo yanoapondash.

³⁴ Ushē 3 yanuc: —Eloi, Eloi, ¿lama sabac-tani? —quequin aton papa chiec Esus comapenec cuēdpondash. Aton onqueten: Papa Edoen, ¿atot-sieshumbini bidiadquin isenquio ique? quec ad-pondash Esus.

³⁵ Aden Nuquin Papa Esusēn chuisho tanti-aquido, Nuquin Papa cuēnec, quenquio yec: — Edias cuēneque. Tanta —quepondash.

³⁶ Aden tantianubi badedi titinqeshun sicaid mucambocquid nēcushtanquin puntanquin cueste dēdectanshun acmenuequin èccuēscadonequi: — Chiata. Edias Esus bedec chonoshe caimbono — quepondash.

³⁷ Adnubien comapenec cuēdec Esus unēsbudpondash.

³⁸ Esus unësbudnubi abi inchëshachimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbud-cuempac caondash tembi daëdquio yec.

³⁹ Adec Esus cuëdbud-cuëdbudec unëso isash: — Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash.

⁴¹ Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid
(*Mat 27.57-61; Duc 23.50-56; Uan 19.38-42*)

⁴² Adashic biednes ushë budtsambi: — Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash.

⁴³ Aidi, Ose Adimateya caid yacnoshon tishaid Pidato yacno nidpondash.

⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: — ¿Ada Esus unësosh? —capondash.

⁴⁵ Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabidiate bedshun Esusen dada imbudshun dataneshun macuësh dapa cuënote shëcuë uaqin ambi nacnenaidën nauedshun cuënote dapan bëtashpondash.

⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16

Esus uincuente chiaid

(Mat 28.1-10; Duc 24.1-12; Uan 20.1-10)

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aitedi nidshun aton na bedtequid menequin comapenec noadte dadpen bedpondash Esus danoshcanuequin.

² Bedtsash badiadtsëcnubi dominco ushë caidën Esus chococacno nidanequi:

³ —¿Tsuntsin cuënote shëcnepeba? —quec onquecuedepac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash.

⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is.

7 Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquo utsibobëdta chuituidec nid –quepondash nëbi caniquid chidobo chiec.

8 Aden chuisho tantiash uëdëquequi chococaid shëcuënuësh puduenanec titinquec dacuëdec on-quentio yec nidanepac caondash chidobo.

Esus abuc indote chiaid

(Mat 28.16-20; Duc 24.13-53; Uan 20.11-23)

9 Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash.

10 Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash.

11 Esus uincuenash capusho isombi, Madia qesho tantiash, Aidquo mimbi isambo iquec, quec tantienquo yec tabadcuededpondash.

12 Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën.

13 Aden ismiac aid daëdi aucbidi Edusaden yacno nidshun ambi isboed chuoapondash. Adembidi tantienquo icoapondash utsibon.

14 Adashic, abëd icquidquo 11ted pete sante cuesten tabadnubi Esus chopondash. Adec choshon: –Uincuenac quequin ëbi isquidon chiaid tantienquo mimbi icpoc. Chobique. Is –capondash Esusën.

¹⁵ Adashic: –Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbit-sen chuiban.

¹⁶ Aden chuisho tantiaquid, Ëbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc.

¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquin ëbi chuibanendac.

¹⁸ Adecbidi, nisinguio piaqui bidisquenguio iquendac. Adecbidi, unësmenuequin acmiaqui unësenquio iquendac. Adembidi, utsi unëstsenho mishac bëdanendac. Nuquin Papan nadatiambocquin namiaidënquio adobanendac –quepondash Èsus.

¹⁹ Aden chuiquin ënacsho Esus abuc buanaqui Nuquin Papan dayun abiucquio Esus tsadtuid-pondash.

²⁰ Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Ëmbi abimbo chuiboedquio mimbi isec aidquio tantianeta. Padi. Aidtedi dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

446da786-5bd1-5ffa-85e2-9eff4052cf8b